



## საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

---

### ანდროლოგია

ანდროლოგია (ბერძნ. anēr, ნათ. ბრ. andros - მამაკაცი და logos - სიტყვა, მოძღვრება), მედიცინის დარგი. მოძღვრება მამაკაცის შესახებ. შეისწავლის მამაკაცის ფიზიოლოგიას და პათოლოგიას.

ტერმინი „ა.“ 1950 შემოიღო გერმ. გინეკოლოგმა კ. ზიბკემ – რეპროდუქციულ პროცესში მამაკაცის თანაბარი მონაწილეობის აღსანიშნავად, ხოლო 1951 ე. სირენმა პირველმა, ჰამბურგში დააარსა ანდროლოგიის ინ-ტი. ინფორმაცია ა-ის, როგორც დარგის შესახებ პირველად მოგვანოდა პროფ. ი. ჟორდანიამ.

საქართველო იყო ერთ-ერთი პირველი ქვეყანა, სადაც გაიხსნა ა-ის განყ-ბები კვლევის 2 მიმართულებით. თბილისში, ქალის ფიზიოლ. და პათოლ. სამეცნ.-კვლ. ინ-ტში (1989-იდან ი. ჟორდანიას სახ. ადამიანის რეპროდუქციის სამეცნიერო-კვლევითი ინსტიტუტი) გაიხსნა ექსპერ. ა-ის ლაბორატორია (გამგე თ. ბეგიაშვილი), ხოლო 1982 შეიქმნა კლინიკური ა-ის განყ-ბა (გამგე თ. დოლიძე). აქ შემუშავდა მამაკაცის უშვილობის მკურნალობის ახ. კომპლექსური მეთოდი. თ. ბეგიაშვილის მონოგრაფია „მამაკაცის უშვილობის პათოფიზიოლოგიის საკითხები“ ( 1990) პირველი და ამავე დროს ფუნდამენტური სახელმძღვანელოა ამ სფეროში. მასში გაშუქებულია ა-ის მეცნიერების თეორიული საფუძვლები, მოცემულია მრავალწლიანი კვლევის პრაქტიკული შედეგები, მამაკაცის უშვილობის კლასიფიკაცია და სხვ. 1976 საქართვე. მეცნ. აკად. ა. ნათიშვილის სახ. ექსპერიმენტული მორფოლოგიის ინ-ტში, ნ. ჭიჭინაძემ დააარსა ა-ის განყ-ბა კვლევის ექსპერიმენტული და ფუნდამენტური მეთოდოლოგიის გათვალისწინებით. 1986 ამ განყ-ბასთან ჩამოყალიბდა ჰორმონებისა და ბიოლოგიურად აქტიური ნივთიერებების კვლევის რადიონუკლიდური მიკროანალიზის ლაბორატორია (გამგე მ. დანიელოვი). ვინაიდან

მამაკაცი ბიო-სოციალური ერთეულია, მისი თვისებების შესწავლა მხოლოდ სისტემური მიდგომით არის შესაძლებელი. ამდენად ის – მედიცინის, ბიოლოგიის, ფსიქოლოგიის, სოციოლოგიის და ფილოსოფიის შესწავლის ობიექტია. აღნიშნული კონცეფცია პირველად, ქართველმა ანდროლოგებმა წამოაყენეს, რაც შემდეგ მსოფლიო საზ-ბამ აღიარა. ასევე პირველად, ქართველმა ანდროლოგებმა შეისწავლეს სქესით დეტერმინირებული მამაკაცის კონკრეტული ფსიქოლ. ტიპი, პირობითი სამეცნ. ტერმინით „კონცეფციური არამზადა“ ( ნ. ჭიჭინაძე, კ. ჭიჭინაძე Advances in Psychology research, New York).

საქართვე. ანდროლოგების მიერ ჩატარებულია მრავალი კონფერენცია და სიმპოზიუმი. გამოქვეყნებულია ა-ის აქტუალური პრობლემებისადმი მიძღვნილი მონოგრაფიები და სახელმძღვანელოები.

**ნ. ჭიჭინაძე**

---